

明史本紀

乾隆四十二年補纂

明史卷七

本紀第七

總裁官總理事務經筵講官少保兼太子太保保和殿大學士兼管吏部戶部尚書事吏部尚書奉
敕修

成祖三

十二年春正月庚寅思州苗平辛丑發山東山西河南
及鳳陽淮安徐邳民十五萬運糧赴宣府二月己酉大
閱庚戌親征衛拉特命安遠侯柳升領大營武安侯鄭
亨領中軍寧陽侯陳懋豐城侯李彬領左右哨成山侯
王通都督譚青領左右掖都督劉江朱榮爲前鋒庚申
振鳳翔隴州饑按長吏不言者罪三月癸未張輔俘陳

季擴于老撾以獻交趾平庚寅發北京皇太孫從夏四月甲辰朔次興和大閱己酉頒軍中賞罰號令庚戌設傳令紀功官丁卯次屯雲谷博羅布哈等來降五月丁丑命尙書光祿卿給事中爲督陣官察將士用命不用命者六月甲辰劉江遇衛拉特兵戰於剛哈拉海敗之戊申次和拉和錫衮瑪哈木特帥衆來犯帝升高見寇分三隊命柳升等分隊夾攻火器齊發帝率鐵騎馳擊大敗之殺王子十餘人追至圖拉河瑪哈木特宵遁庚戌班師宣捷於阿魯台戊午次三峰山阿魯台遣使來朝己巳以敗衛拉特詔天下秋七月戊子次紅橋詔六

師入關有踐田禾取民畜產者以軍法論己亥次沙河
皇太子遣使來迎八月辛丑朔至北京御奉天殿受朝
賀丙午蠲北京州縣租二年戊午賞從征將士九月癸
未郭亮徐亨備開平丙戌靖州苗平甲午費瓚鎮甘肅
劉江鎮遼東是月晉王濟熈以讒廢爲庶人進封平陽
王濟熈爲晉王閏月甲辰以太子遣使迎駕緩徵侍讀
黃淮侍講楊士奇正字金問及洗馬楊溥芮善下獄未
幾釋士奇復職甲子召吳高還丁卯命都督朱榮鎮大
同冬十一月甲辰錄囚庚申蠲蘇松杭嘉湖水災田租
四十七萬九千餘石是年尼博囉國沙的新葛來朝封

爲王彭亨烏斯藏入貢眞臘進金縷衣琉球中山王貢
馬榜葛刺貢麒麟

十三年春正月丙午塞居庸以北隘口丁未瑪哈木特
謝罪請朝貢許之壬子北京午門災戊午敕內外諸司
蠲諸宿逋將士軍官犯罪者悉宥之二月癸酉遣指揮
劉斌給事中張磐等十二人巡視山西山東大同陝西
甘肅遼東軍操練屯政覈實以聞甲戌命行在禮部會
試天下貢士癸未張輔等師還戊子論平交趾功賞賚
有差乙未釋工作囚徒三月己亥策士於北京賜陳循
等進士及第出身有差丙午廣西蠻叛指揮同知葛森

討平之夏四月戊辰命張輔鎮交趾甲申兵部尙書兼詹事金忠卒五月丁酉朔日有食之乙丑鑿清江浦通北京漕運六月振北京河南山東水災秋七月癸卯鄭和還乙巳四川戎縣山都掌蠻平八月庚辰振山東河南北京順天州縣饑九月壬戌北京地震冬十月甲申獵於近郊壬辰法司奏侵冒官糧者帝怒命戮之及覆奏帝曰朕過矣仍論如律自今死罪者皆五覆奏著爲令十二月蠲順天蘇州鳳陽浙江湖廣河南山東州縣水旱田租是年琉球山南山北瓜哇西王占城古里柯枝南渤利甘巴里滿刺加忽魯謨斯哈密哈喇賽瑪爾

堪火州吐魯番蘇門答刺俺都淮錫喇斯入貢麻林及
諸番進麒麟天馬神鹿琉球中山入貢者再

十四年春正月己酉北京河南山東饑免永樂十二年
逋租發粟一百三十七萬石有奇振之辛酉都督金玉
討山西廣靈山寇平之三月癸巳命都督梁福鎮湖廣
貴州壬寅阿嚕台敗衛拉特來獻捷壬申禮部尙書呂
震請封禪帝曰今天下雖無事四方多水旱疾疫安敢
自謂太平且六經無封禪之文事不師古甚無謂也不
聽夏四月乙亥以胡廣爲文淵閣大學士六月丁卯命
都督同知蔡福等備倭山東秋七月丁酉遣使捕北京

河南山東州縣蝗壬寅河決開封乙巳錦衣衛指揮使紀綱謀不軌伏誅八月癸酉旦壽星見禮臣請上表賀不許丁亥作北京西宮九月癸卯京師地震戊申發北京冬十月丁丑次鳳陽祀皇陵癸未至自北京謁孝陵十一月壬寅詔文武羣臣集議營建北京丙午召張輔還戊申漢左高煦以縱軍士劫掠削二護衛徙山東山西湖廣流民於保安州賜復三年十二月丁卯鄭和復使西洋是年占城古里瓜哇滿刺加蘇門答刺南巫里淳泥彭亨錫蘭山溜山南渤利阿丹麻林忽魯謨斯柯枝入貢琉球中山入貢者再

十五年春正月丁酉大祀天地於南郊壬子平江伯陳瑄督漕運木赴北京二月癸亥谷王穗謀逆廢爲庶人丁卯命豐城侯李彬鎮交趾壬申命泰寧侯陳珪董建北京柳升王通副之三月丁亥交趾始貢士至京師丙申詔雜犯死罪以下囚輸作北京贖罪丙午漢王高煦謀逆事覺帝欲免爲庶人以皇太子救解徙封樂安州壬子北巡發京師皇太子監國夏四月己巳次邾城申禁軍士毋踐民田稼有傷者除今年租或先被水旱逋租亦除之癸未西宮成五月丙戌至北京六月丁酉李彬討交趾賊黎核斬之己亥中官張謙使西洋還敗倭

寇於金鄉衛秋七月乙亥賜皇太子務本之訓諭曰此書備修齊治平之道能沉潛玩味大有益矣八月甲午甌寧人進金丹帝曰此妖人也令自餌之毀其方書九月丁卯曲阜孔子廟成帝親製文勒石冬十月李彬敗交趾賊楊進江斬之十一月癸酉命禮部尙書趙玗爲兵部尙書巡視塞北屯戍軍民利弊是年西洋蘇祿東西峒王來朝琉球中山巴什伯里琉球山南眞臘淳泥占城暹羅哈喇賽瑪爾堪入貢

十六年春正月甲寅交趾黎利反都督朱廣擊敗之甲戌倭陷松門衛按察司僉事石魯坐誅命興安伯徐亨

都督夏貴備開平二月辛丑交趾四忙縣賊殺知縣歐陽智以叛李彬遣將擊走之三月甲寅賜李騏等進士及第出身有差命都督僉事劉鑑備邊大同戊寅姚廣孝死夏五月庚戌重修太祖實錄成丁巳胡廣卒秋七月己巳敕責陝西諸司比聞所屬歲屢不登致民流莠有司坐視不恤又不以聞其咎安在其速發倉儲振之贊善梁潛司諫周冕以輔導皇太子有闕皆下獄死冬十二月戊子諭法司朕屢赦中外官潔已愛民而不肖官吏恣肆自若百姓苦之夫良農必去稂莠者爲害苗也繼今犯賊必論如法辛丑命成山侯王通馳傳振陝

西饑是年暹羅占城瓜哇蘇門答刺尼博羅滿刺加南
渤利哈喇沙哈爾千里達賽瑪爾堪入貢琉球中山人
貢者再

十七年春二月乙酉命興安伯徐亨備興和開平大同
夏五月丙午都督方政敗黎利於可藍柵六月壬午免
順天府去年水災田租戊子劉江殲倭寇於望海埭封
江廣寧伯秋七月庚申鄭和還八月中官馬騏激交趾
父安土知府潘僚反九月丙辰慶雲見禮臣請表賀不
許冬十二月庚辰諭法司曰刑者聖人所慎匹夫匹婦
不得其死足傷天地之和召水旱之災甚非朕寬恤之

意自今在外諸司死罪咸送京師審錄三覆奏然後行
刑乙未命工部侍郎劉仲廉覈實交趾戶口田賦察軍
民利病是年哈密吐魯番錫喇斯伊思帕罕真臘占城
哈喇阿魯南渤利蘇門答刺巴達克山滿刺加入貢琉
球中山入貢者四

十八年春正月癸卯李彬及都指揮孫霖徐諤敗黎利
於磊江閏月丙子以翰林院學士楊榮金幼孜爲文淵
閣大學士庚辰擢人材布衣馬麟等十三人爲布政使
叅政叅議二月己酉蒲臺妖婦唐賽兒作亂命安遠侯
柳升帥師討之三月辛巳敗賊於卸石柵寨都指揮劉

忠戰沒賽兒逸去甲申山東都指揮僉事衛青敗賊於
安邱指揮王真敗賊於諸城獻俘京師戊子山東布政
使儲埏張海按察使劉本等坐縱盜誅戊戌以逗留徵
柳升下吏尋釋之夏五月壬午命左都督朱榮鎮遼東
庚寅交趾叅政侯保馮貴禦賊戰死六月丙午北京地
震秋七月丁亥命徐亨備開平八月丁酉朔日有食之
九月己巳召皇太子丁亥詔自明年改京師爲南京北
京爲京師冬十月庚申李彬遣指揮使方政敗黎利於
老撾十一月戊辰以遷都北京詔天下是月振青萊饑
十二月己未皇太子及皇太孫至北京癸亥北京郊廟

宮殿成是年始設東厰命中官刺事古麻刺朗王來朝
暹羅占城爪哇滿刺加蘇門答刺蘇祿西王入貢

十九年春正月甲子朔奉安五廟神主於太廟御奉天
殿受朝賀大宴甲戌大祀天地於南郊戊寅大赦天下
癸巳鄭和復使西洋二月辛丑命都督僉事胡原帥師
巡海捕倭三月辛巳賜曾鶴齡等進士及第出身有差
夏四月庚子奉天華蓋謹身三殿災詔羣臣直陳闕失
以言遷都不便殺主事蕭儀乙巳詔罷不便於民及不
急儲務蠲十七年以前逋賦免去年被災田糧已酉萬
壽節以三殿災止賀癸丑蹇義等二十六人巡行天下

安撫軍民五月乙丑出建言給事中柯暹御史何忠鄭維桓羅通等爲知州庚寅令交趾屯田秋七月己巳帝將北征敕都督朱榮領前鋒安遠侯柳升領中軍寧陽侯陳懋領御前精騎永順伯薛斌恭順伯吳克忠領馬隊武安侯鄭亨陽武侯薛祿領左右哨英國公張輔成山侯王通領左右掖八月辛卯朔日有食之冬十一月辛酉分遣中官楊實御史戴誠等覈天下庫藏出納之數丙子議北征軍餉下戶部尙書夏原吉刑部尙書吳中於獄兵部尙書方賓自殺辛巳侍讀李時勉以條上時務十五事忤帝意下獄甲申發直隸山西河南山東

及南畿應天等五府滁和徐三州丁壯運糧期明年二月至宣府是年衛拉特賢義王太平安樂王巴圖博羅來朝忽魯謨斯阿丹祖法兒刺撒不刺哇木骨都束古里柯枝加異勒錫蘭山溜山南渤利蘇門答刺阿魯滿刺加甘巴里蘇祿榜葛刺淳泥古麻刺朗王入貢暹羅入貢者再

二十年春正月己未朔日有食之罷朝會詔羣臣修省辛未大祀天地於南郊壬申豐城侯李彬卒於交趾二月乙巳命隆平侯張信兵部尙書李慶分督北征軍餉役民夫二十三萬五千有奇運糧三十七萬石三月丙